

# Sistem pendidikan tinggi negara lonjak ke tangga 25 U21

Oleh KAMARUDIN HAMZAH

**BESUT** - Sistem pendidikan tinggi negara terus mendapat pengiktifan antara-bangsa apabila melonjak ke tangga 25 dalam kedudukan Sistem Pengajian Tinggi Nasional Universitas 21 (U21) 2017 yang dikeluarkan baru-baru ini.

Menteri Pendidikan Tinggi, Datuk Seri Idris Jusoh (**gambar**) berkata, ia peningkatan 11 anak tangga berbanding kedudukan ke-36 dalam penilaian U21 yang dikelolakan Institut Kajian Sosial dan Ekonomi Gunaan, Universiti Melbourne, Australia sebelum ini.

“Tambah membanggakan, lima institusi pengajian tinggi (IPT) tempatan iaitu Universiti Malaya (UM), Universiti Sains Malaysia (USM), Universiti

Kebangsaan Malaysia (UKM), Universiti Teknologi Malaysia (UTM) dan Universiti Putra Malaysia (UPM) berada dalam kalangan antara lapan universiti terbaik Asia Tenggara.

“U21 merupakan penilaian melibatkan rangkaian universiti terkemuka dunia seperti Universiti Cambridge yang berinsentifkan penyelidikan dan mengambil kira elemen sumber, persekitaran, jaringan, hubungan antarabangsa dan keberhasilan,” katanya kepada pemberita di sini semalam.

Terdahulu beliau ditemui selepas menyerahkan Rumah Komuniti ke-174 bagi daerah Besut kepada Wan Rosliza Wan Nawawi, 46, yang merupakan seorang ibu tunggal di Kampung Tok Has di sini.

